

nois de découvrir les Indes Occidentales pour le Roy d'Espagne, & que les Portugais eurent la cognoissance des Orientales, par le Cap de Bonne Esperance : Henry Roy d'Angleterre y voulut aussi enuoyer de son costé, par la Bande du Nord pourquoy il despetcha Sebastian Cabot en l'an 1499. lequel y cherchent passage par cette route, decouvrit seulement la Brador, sans auoir passé plus outre, fortifié ny pris possession d'aucune terre. Ne se trouuant que depuis les Roys d'Angleterre y eussent enuoyé comme auoient fait ceux de France, sinon aux années 1576. 1577. & 1578. que la Reine Elizabeth obstinant la decouverte de ce passage, y renuoya par trois voyages subsecutifs, Messire Martin Frobisher, puis en l'an 1584. y despacha Homfroy Guilbert, & tost apres, Iehan Dauis lequel y decouvrit le destroit appellé Dauis de son nom: Neantmoins puis que se n'estoit que pour trouuer passage en la mer du Sud iusques a present incognu, les Anglois n'en peuuent tirer aucun droit. Et partant ayants passé iusques à la grande riuere Saint Laurens, destruit brulé les forts & habitations de Quilbec Port Royal, Tadouzac, & autres lieux, que nous y tenions & auions faicts faire & Balthir des y auoit si long temps, il ny a raison ny aparence à eux d'y rien pretendre apresent : & encor y sont d'autant moins fauorables, qu'ils y ont faict ces dernieres entreprises par force & violence, le Roy estant occuppé au siege de la Rochelle, & à la reprise de l'Isle de Ré proche d'icelle, qu'ils auoient surprise sur nous en pleine paix.

Mais la maiesté tres Chrestienne tousiours triomphante & victorieuse assistee de son espouse, a present Reyne Regente ayant pris a leur barbe cette importante ville maritime de la Rochelle qu'ils s'efforçoient de secourir, & les ayant battus & chassés de cette Isle, par plusieurs Combats & Victoires, tant par mer que par terre; puis au partir de la trauerse aussi tost,